

## Visitaforedrag ved bispevisitas i Fitjar 30. nov – 2. des og 5. des 2021

Kjære Fitjar kyrkjelyd!

Takk for ein fin visitas her i Fitjar. Eg har fått eit godt inntrykk av folket og bygda gjennom møter med staben, soknerådet, kommunen, skulen, konfirmantane, næringslivet og ikkje minst på den flotte kulturkvelden på tysdag. Eg har lært nytt om både lakseoppdrett, Fitjar si historie frå Håkon den gode til i dag og det gode arbeidet som skjer i kyrkje og bedehus her i bygda.

Etter ein visitas skal biskopen oppsummera sine inntrykk i dette visitaforedraget, som er blitt til i samarbeid med kyrkjefagsjef Tore Skjæveland og etter samtale med prost Svein Arne Theodorsen.

### *Gudstenestelivet*

Gudstenesteframmøtet er godt i Fitjar. Men det kjem ikkje av seg sjølv, difor må me oppmuntra kvarandre til å gå regelmessig. Her høyrer me til, her får me næring for vårt åndelege liv og her skal me saman æra den treeinige Gud.

Difor er det flott at de har eit gudstenesteval som arbeidar med kvaliteten og kyrkjemusikken. I det heile er de flinke til å involvera kyrkjelyden som medarbeidarar i gudstenestearbeidet. De har eit stort korps av kyrkjevertar, frivillig klokkarteneste, blomeansvarlege, nattverdalk-vaskarar og kyrkjekaffiansvarlege. Og mitt inntrykk er at de arbeidar aktivt med spørsmålet: Korleis gjera gudstenesta relevant for fleire? Korleis kan unge menneske få gode gudstenesteopplevingar? Eg trur de er på rett spor nå de drøftar bruken av band og annan musikk og involvering av ungdom. Det går an å gjera eit par av dei forordna gudstenestene til ungdomsgudstenester dersom de vil det.

### *Gudstenester på nettet*

Det er imponerande at de i Fitjar har klart å senda gudstenester på nettet heilt frå fyrste koronasøndag i 2020. Eg vil gje ros til alle som har vore med og særleg til kantor og kyrkjeverje Jan Overweg som tok initiativ og starta med mobiltelefon og har sørga for oppgradering av det tekniske nivået. At dette betyr mykje, er heva over ein kvar tvil. Folk som er einsame, har dårleg helse, er

vekkreiste eller av andre grunnar ikkje kan vera fysisk til stades, får no del i Guds ord og fellessopplevinga i gudstenesta. Dette er eit evangelisk arbeid for å nå ut med den gode budskapet. Og det lukkast de med, det ser ein av dei høge sjåartal på nettet. Dette må de halda fram med og utvikla vidare. Det er nok lurt å få til ei gruppe frivillige, ei mediagruppe, som kan dela på ansvaret slik at dette bli mindre sårbart.

### *Kyrkjemusikk*

Kyrkjemusikken er med å løfta gudstenesteopplevinga. De har ein dyktig kantor som har starta kyrkjekor og som kan involvera musikarar, har konsertar og bidrar til at kyrkjemusikken vert opplevd som berikande ved både gudstenester og kyrkjelege handlingar. Det er òg spennande at de har hatt temakveld om «Ei musikalsk reise gjennom liturgien».

### *Vaksenundervisning*

Eg vil gje ros for at de har stått på i nesten 30 år med temakveldar for vaksne. Det var vel fortent at de fekk både prostirådet sin frivilligpris og Fitjar kommune sin kulturpris. Det er viktig at det finst tilbod der ein kan læra om trua og gje rom for aktuelle tema og samtale.

### *Trusopplæringa*

Trusopplæringsarbeidet er godt og kreativt med stor oppslutning. Det er til og med over 100% av målgruppa på babysong og fleire av tiltaka før skulealder. Det skal den dyktige kyrkjelydspedagogen ha sin del av æra for, saman med alle frivillige som er med.

Det er òg høg konfirmasjonsprosent, og eg er glad for at de satsar på møteplassen som kallast «Vidare» for dei etter konfirmasjonen. Her får ungdommen samtale med vaksne og stille spørsmål om trua og livet. Det er eit framifrå tiltak. Fortsett med det!

Så er det også fint at ein saman med bedehuset klarar å gje eit godt tilbod som Ten-treff på fredagane. Skal ein gå vidare, må de vurdere eit leiartreningstilbod, gjerne saman med organisasjonane eller andre kyrkjelydar.

I samanheng med trusopplæringa er det òg naturleg å nemne barnehagen som kyrkjelyden driv. Takka vere ei god leiing og dyktige medarbeidarar har til saman mange hundre barn gjennom åra her fått eit godt oppvekstmiljø som òg inkluderer eit tidleg møte med den kristne trua.

### *Frivillig teneste*

Eg gler meg over alle som gjer ein frivillig innsats i kyrkjelyden. Det er godt for dei sjølv og dei får bety noko for andre. Det er imponerende mange utval og nemnder i kyrkjelyden. Men med mange frivillige trengs det òg nokon som kan støtta dei og ta seg av nødvendig organisering. Tidlegare hadde de ei frivillignemnd, men den er ikkje i funksjon no. Kanskje må de få opp igjen denne nemnda, eller de må skaffa nokon som kan vera ein koordinator for det frivillige arbeidet. Mange stader har dei ein frivilligkoordinator som gjer det. Det kan vera ein del av ein stilling retta mot diakoni, eller ein i staben. Ein slik prosentstilling kan vera mogeleg å få til med gjevarteneste.

### *Diakoni*

Diakonien fungerer i Fitjar, det er bra. De har ei diakoninemnd som sørger for blant anna to pensjonistturar i året, blomehelsingar, og ei besøksteneste med heile 20 frivillige. I tillegg kan dei som er einsame følga gudstenesta heime på nettet. Det er eit godt og viktig diakonalt tiltak.

### *Samarbeid med bedehuset*

Det er gledeleg å høyra om eit aktivt bedehus med mykje godt arbeid her i Fitjar. Mange stader i bispedømet er det diverre ikkje slik lenger. Eg veit at det har vore uro også her i Fitjar, men eg er glad for at ein ser at ein når lenger i Guds rike ved å arbeida godt saman.

## *Strategiarbeidet*

Fitjar sokneråd skal ha ros for at ein har eit eige strategiutval. Ein har starta eit godt strategiarbeid der ein tar tak i dei utfordringane ein ser. Det er bra at ein har eit vidt utsyn og har med både kva kyrkja kan bety i bygda og utanfor bygda i den verdsvide kyrkja. Her må de halda fram som de stemner, så strategien kan føra til ein handlingsplan med målbare tiltak.

## *Gjevarteneste*

Når ein har ein god strategi, må ein og skaffa seg musklar til å setja det ut i livet - økonomiske musklar. Me treng å minna kvarandre om at kyrkja treng meir enn det me får frå kommunen dersom me skal nå ut til alle i bygda. Då må me gjera som kyrkjene rundt i verda, gje til eige arbeid, til dei aktivitetane som kommunen ikkje skal dekkja.

De hadde ei velfungerande gjevarteneste den tida de hadde kyrkjelydsprest og no er det på tide å få den opp igjen. Då må ein vera konkret så folk ser kva dei gjev til, anten det er ei stilling som frivilligkoordinator, innan trusopplæring eller diakoni eller noko anna. Den må gjerne ha fleire alternativ, så ein kan gje til det som står eins hjarta nærast. Då kan ein utfordra nye folk, sjølv dei som ikkje enno er kyrkjegjengarar, til å bli med på ein dugnad for eit godt arbeid.

## *Takk til kommunen*

Eg vil takka kommunen for eit godt møte med kommuneleiinga. Eg set pris på at ordføraren har vore med på fleire møtepunkt i visitasen. Det viser at her er det ein god dialog, og at kommunen ser det viktige bidraget som Fitjar kyrkjelyd gjev til å bygga eit godt samfunn for alle. Eg vil særskilt nemne at eg er glad for at kommunen har sagt at dei no vil vera med å få til ein parkeringsplass for rørslehemma nær kyrkja.

## *Takk*

Til slutt vil eg seia takk for ein god visitas med mange gode opplevingar. Eg vil takka sokneprest Roald Drønen, heile staben, soknerådet, kyrkjevevja og alle dei som dagleg legg ned ein stor arbeidsinnsats i kyrkjelyden. Ei særleg takk til

Roald Drønen og Hermann Inge Ådland som har hatt hovudansvaret for å skrive visitasmeldinga! Den er velskriven og inneheld mykje god informasjon.

Takk til staben og frivillige for god førebuing og tilrettelegging av visitasen. Takk også til prost Svein Arne Theodorsen som har vore med å planlegga og gjennomføra denne visitasen og som er biskopens utstrekke arm til Fitjar når biskopen ikkje er her.

Og får de nokre utfordringar som summerar opp denne visitasen. Om eit år vil eg ha ei tilbakemelding om korleis de har arbeidd med dette:

- Gå til gudsteneste regelmessig både for dykkar eiga skuld og for å gje Guds ære.
- Det gode arbeidet med gudstenester på nettet må halda fram. Lag ei mediagruppe slik at dette ikkje vert så sårbart, men ein fast del av kyrkjelyden sitt liv.
- De må vurderer om de treng ei stilling for ein frivilligkoordinator.
- Fullfør det gode strategiarbeidet med ein målbar handlingsplan.
- Gjevartenesta må de få opp å gå igjen.

Og med desse utfordringane takkar eg for meg og reiser frå Fitjar med mange flotte inntrykk. Eg takkar for desse dagane og ynskjer Guds signing over folket og kyrkja i Fitjar!

Bjørgvin bispestol, 5. desember 2021

Halvor Nordhaug